



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Broj:
Sarajevo, __. __. 2021. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na __. sjednici održanoj _____ godine, primilo je k znanju

Informaciju o realizaciji vijećničkih pitanja i inicijativa za tekuću godinu

PREDSJEDAVALJUĆI GRADSKOG VIJEĆA

Jasmin Ademović

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNIK

Informacija

o realizaciji vijećničkih pitanja i inicijativa za tekuću godinu

Predlagač: Gradonačelnica

**Obrađivač: Gradska služba za opću upravu
i zajedničke poslove**

Sarajevo, juli 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Programom rada Gradskog vijeća Grada Sarajeva za 2021. godinu, broj 01-GV-02-1381/20 od 30.12.2020. godine za mjesec jul, planirano je razmatranje Informacije o realizaciji vijećničkih pitanja i inicijativa za tekuću godinu.

Informacijom o realizaciji vijećničkih pitanja i inicijativa za tekuću godinu obuhvaćena je realizacija vijećničkih pitanja i inicijativa koja su dostavljene gradonačelnici, i to: Vijećnička pitanja i inicijative sa 1. sjednice Gradskog vijeća Grada Sarajeva održane 26.05.2021. godine i Vijećnička pitanja i inicijative sa 2. sjednice Gradskog vijeća Grada Sarajeva održane 02.06.2021. godine,

Odgovori na Vijećnička pitanja i inicijative su dati kako slijedi:

1. Na 1. sjednici Gradskog vijeća Grada Sarajeva, gradska vijećnica Biljana Lazarević uputila je sljedeću inicijativu u ime Kluba gradskih vijećnika „Narod i Pravda“:

Zadužuje se Pravobranilaštvo Grada Sarajeva da dostavi cjelovitu Informaciju o Statusu imovine na adresi Hamdije Kreševljakovića br. 3 s procjenom i mjerama za ostvarenje imovinskih interesa Grada Sarajeva na ovu imovinu. Rok izvršenja je 30 dana.

Odgovor:

Na Prvoj sjednici Gradskog vijeća Grada Sarajeva održanoj dana 26.05.2021. godine usvojena je inicijativa i zaključak pod tačkom 3. kojom je, između ostalog, zaduženo Pravobranilaštvo Grada Sarajeva da o pokretanju revizije opravdanosti davanja na korištenje prostorija statutarog sjedišta Grada Sarajeva na adresi Hamdije Kreševljakovića broj 3 obavijesti nadležne organe Federacije BiH.

Pravobranilaštvo Grada Sarajeva je u cijelosti postupilo po zaključku i aktu, broj 01-08-Gp-35/21 od 08.06.2021. godine, i obavijestilo Vladu Federacije BiH, Službu za zajedničke poslove organa i tijela FBiH, Predstavnički dom Parlamenta FBiH i Dom naroda Parlamenta FBiH kao nadležne organe o usvojenoj inicijativi i zaključku Gradskog vijeća Grada Sarajeva, o čemu Vam u prilogu dostavljamo fco. akta sa dokazom o prijemu.

2. Na 1. sjednici Gradskog vijeća Grada Sarajeva održanoj 26.05.2021. godine, gradska vijećnica Lajla Čosović uputila je sljedeću inicijativu:

„Istinski podržavam realizaciju projekta „Čista Miljacka“. Zbog velikih zemljanih nanosa i kanalizacionog otpada koji svakodnevno donose padinski potoci, rijeka Miljacka ovih dana pruža sliku zapuštenosti. Stanje će se sigurno dalje pogoršavati, a nakon nadolazećih ljetnih temperatura s mogućim posljedicama po zdravlje građana. Imajući u vidu ovu činjenicu, potrebno je da Grad Sarajevo preduzme hitne mjere na čišćenju ove centralne gradske rijeke, a s obzirom da je održavanje njenog korita zapravo i u nadležnosti Grada Sarajeva, kako bi Miljacka dobila jedan prihvatljiv urbani izgled“.

Odgovor:

S tim u vezi, obavještavamo Vas da je Grad Sarajevo aktivno radi na upravljanju uređenim vodotocima u nadležnosti Grada te su pokrenute mnoge aktivnosti na ovom polju.

Vaša inicijativa je vrijedna pažnje i na tragu je onoga što je već planirano da se uradi ili se već radi kako bi se kvalitetno upravljalo vodotocima i konkretno koritom rijeke Miljacke, za šta je Grad Sarajevo direktno nadležan po federalnom i kantonalnom zakonu. Nažalost, opće je poznat princip da prenesene nadležnosti na niže nivoe moraju da prate i adekvatna novčana sredstva kako bi se data obaveza mogla realizovati, što u našem primjeru nije slučaj. Grad Sarajevo izuzetnim naporima u okviru raspoloživog budžeta nastoji uraditi što je više moguće na tekućem održavanju korita rijeke

Miljacke u smislu redovnog košenja zelenih kosina, skupljanja sitnog i kabastog otpada u koritu, održavanju stopa mostova i slično.

Projekat „Čista rijeke Miljacka“ je od izuzetnog značaja za Grad Sarajevo. Da bi se ovaj projekat u potpunosti realizovao neophodna su višemilionska ulaganja i sinergijski rad gradskih općina, Kantona Sarajevo, općina u entitetu RS i Grada Sarajeva te se nadamo da će se to u bliskoj budućnosti i ostvariti.

3. Na 1. sjednici Gradskog vijeća Grada Sarajeva održanoj 26.05.2021. godine gradski vijećnik Muamer Mekic uputio je inicijativu „da Grad Sarajevo u saradnji sa Ministarstvom saobraćaja Kantona Sarajeva poduzme sve potrebne aktivnosti kako bi se tunel osvijetlio Bentbaša.“

Odgovor:

S tim u vezi, obavještavamo Vas da je Grad Sarajevo nije direktno nadležan za pomenuti tunel, ali obzirom na značaj ovog tunela koji je glavni ulaz u grad sa istoka, Grad Sarajevo će razmotriti mogućnosti njegove sanacije, izvora finansiranja i saradnje sa drugim nadležnim subjektima.

4. Na 1. sjednici Gradskog vijeća Grada Sarajeva održanoj 26.05.2021. godine vijećnik Adi Škaljić uputio je inicijativu „za izgradnju spomen-obilježja ubijenom učeniku Denisu Mrnjavcu ispred Srednje mašinske – tehničke škole u Sarajevu“.

Odgovor:

S tim u vezi, obavještavamo Vas da će Grad Sarajevo Vašu inicijativu uputiti na daljnje razmatranje Komisiji za spomenike Gradskog vijeća koja je nadležna za ova pitanja.

5. Na 2. sjednici Gradskog vijeća Grada Sarajeva zamjenica predsjedavajućeg Gradskog vijeća Grada Sarajeva Mirela Džehverović uputila je vijećnička pitanja koja se odnosi na biciklističku stazu na području općine Novo Sarajevo i to:

Kada će biti završeni radovi na biciklističkoj stazi u ulici Zmaja od Bosne (između Socijalnog i Dolac Malte) na području općine Novo Sarajevo? Kada su trebali biti završeni radovi? Koja firma je izvođač radova? Po kom nacrtu se stavljaju graničnici između šetnice i biciklističke staze? Kako staza još nije završena, postoji li mogućnost da se ne stavljaju ili sklone ovakvo postavljeni ivičnjaci?

Odgovor:

Izgradnja biciklističke staze na području općine Novo Sarajevo od III do XI transverzale izvode se na osnovu projektne dokumentacije i odobrenja za građenje izdate od nadležnog općinskog organa, a ugovoreni su sa izvođačem radova Bosman d.o.o.. Radovi se trenutno odvijaju usporenim intenzitetom, jer su uslovljeni radovima na zamijeni glavnog gradskog potisnog cjevovoda, projektom koji realizuje KJKP „VIK“ Sarajevo.

Građevinski radovi na izgradnji biciklističke staze na poddionici između Socijalnog i Dolac Malte u dužini od 380m su završeni, a trenutno se izvode radovi na obnovi pješačke staze uz biciklističku stazu na ovoj dionici koju investira Općina Novo Sarajevo.

Na biciklističkoj stazi nisu predviđeni „graničnici“ između pješačke i biciklističke staze.

6. Na 2. sjednici Gradskog vijeća Grada Sarajeva održanoj 02.06.2021. godine, gradska vijećnica Marijela Hašimbegović uputila je vijećničku inicijativu sljedećeg sadržaja: „Upućujem inicijativu za pokretanjem aktivnosti oko čišćenja grafita sa fasada.”
Sa obrazloženjem: „Sa ciljem stvaranja ljepše slike Grada Sarajeva, ugodnijeg ambijenta za življenje, neophodno je ukloniti grafite sa privatnih i javnih objekata. Grafiti na fasadama u ovolikom broju ostavljaju utisak zapuštenosti i očekujem hitnu reakciju po ovom pitanju.”

Odgovor:

Grad Sarajevo je u proteklom mandatnom periodu aktivno poduzimao sve aktivnosti po pitanju uklanjanja grafita sa fasada objekata, gdje je odabir objekata rađen u skladu sa „Elaboratom za uklanjanje grafita sa fasada uže historijske jezgre“ koji je izrađen od strane Kantonalnog zavoda za zaštitu kulturno-historijskog i prirodnog naslijeđa Sarajevo, 2018. godine. Povodom čega je pokrenuta Kampanja uklanjanja grafita „Zajedno za ljepše Sarajevo” koja se organizovana u saradnji sa ICITAP-om (International Criminal Investigative Training Assistance Program), MUP-om Kantona Sarajevo i Gradom Sarajevo. U periodu od 2018. pa do kraja 2020. godine uklonjeni su grafiti sa 48 objekata. Radi nepovoljne epidemiološke situacije u 2020. godini uklonjeni su grafiti samo sa fasade Stare pravoslavne crkve (Crkva svetih arhanđela Mihaila i Gavrila) u Sarajevu. U Budžetu za 2021. godinu planirana su sredstva u iznosu 50.000,00 KM za potrebe ovog projekta, međutim sa te pozicije izvršena je preraspodjela sredstava na druge značajnije projekte. Aktivnosti po pitanju uklanjanja grafita će se nastaviti nakon rebalansa Budžeta u 2021. godini.

7. Na 2. sjednici Gradskog vijeća Grada Sarajeva održanoj dana 02.06.2021. godine, gradska vijećnica Marijela Hašimbegović postavila je vijećničko pitanje sljedećeg sadržaja: „Molim da mi se dostavi spisak uposlenika Gradske uprave sa nazivom radnog mjesta na koje su raspoređeni zaključno sa 31.03.2021. godine.”

Odgovor:

U svrhu odgovora na postavljeno pitanje, u prilogu je dostavljen tabelarni prikaz radnih mjesta sistematizovanih Pravilnikom o unutrašnjoj organizaciji i sistematizaciji radnih mjesta organa uprave Grada Sarajeva, broj 01/04-30-2804/20 od 05.05.2020. godine, broj 01/04-30-2804-3/20 od 24.06.2020. godine i broj 01/04-30-2804-4/20 od 31.12.2021. godine i Pravilnikom o unutrašnjoj organizaciji i sistematizaciji radnih mjesta Stručne službe gradonačelnika Grada Sarajeva, broj 01/04-30-3738/20 od 06.07.2020. godine, sa unesenim imenima uposlenika raspoređenih i postavljenih na radna mjesta zaključno sa 31.03.2021. godine.

8. Na 2. sjednici Gradskog vijeća Grada Sarajeva održanoj 02.06.2021. godine, gradski vijećnik Ratko Orozović uputio je inicijativu kojom predlaže gradonačelnici Grada Sarajeva da jednom u mjesecu odredi termine gdje bi građani Sarajeva mogli doći sa određenim inicijativama.

Odgovor:

Građani imaju mogućnost i svakodnevno šalju inicijative gradonačelnici Grada Sarajeva putem različitih sredstava komunikacije.

9. Na 2. sjednici Gradskog vijeća Grada Sarajeva održanoj 02.06.2021. godine, Odbor za informatiku i telematiku Gradskog vijeća Grada Sarajeva uputio je inicijativu sljedećeg sadržaja:

„Odbor za informatiku i telematiku Gradskog vijeća Grada Sarajeva upućuje inicijativu Gradskom vijeću kojom predlaže da se na službenoj stranici Grada Sarajeva učini dostupnim obrazac zahtjeva za upotrebu imena, grba i isticanju zastave Grada Sarajeva u kojem će biti naznačena sva neophodna dokumentacija koja je potrebna za podnošenje zahtjeva.“

Odgovor:

Inicijativa je realizovana objavljivanjem na službenoj web stranici Grada Sarajeva Odluke o upotrebi grba, imena i isticanju zastave Grada Sarajeva („Službene novine Kantona Sarajevo“, broj 05/06- prečišćeni tekst, br. 33/07 i 25/19) kojom su propisani uslovi, potrebna dokumentacija i visina naknade za upotrebu imena i grba Grada Sarajeva. Grad Sarajevo nije sačinio obrazac, jer bilo kojom formom obrasca ne bismo postigli traženu svrhu istog.

10. Na 2. sjednici Gradskog vijeća Grada Sarajeva održanoj 02.06.2021. godine, gradska vijećnica Enisa Spahić uputila je inicijativu za osnivanje Zdravstvenog savjeta Grada Sarajeva koji bi predlagao mjere za poboljšanje dostupnosti i kvaliteta zdravstvene zaštite, davao mišljenje na planove i programe zdravstvene zaštite, organizovao obrazovne kurseve za građanstvo iz poznavanja materije o pravima pacijenata i odgovarajućim promjenama u zdravstvenim ustanovama, a u saradnji sa Zdravstvenim savjetima lokalnih zajednica.

Odgovor:

Odredbom člana 16. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) propisane su nadležnosti Grada Sarajeva:

„Grad Sarajevo je nadležan za:

- 1. urbano planiranje/upotrebu lokalnog zemljišta;*
 - 2. javne službe/infrastrukturu (vodu, kanalizaciju, prikupljanje otpada, grijanje, gas, tržnice, javne parkove, vatrogasne brigade, lokalne zdravstvene službe, sportske objekte, groblja);*
 - 3. gradske finansije;*
 - 4. javni saobraćaj;*
 - 5. kulturu;*
 - 6. osnovno i srednje obrazovanje;*
 - 7. lokalni biznis;*
 - 8. dobrotvorne organizacije;*
 - 9. lokalni radio i televiziju;*
 - 10. lokalni turizam;*
 - 11. izvršne aspekte stambene politike (dodjela stanova, planiranje, izgradnja i održavanje zgrada u društvenom vlasništvu, odluke o visini stanarina);*
 - 12. druge nadležnosti koje Gradu Sarajevu prenese Kanton Sarajevo, odnosno povjere općine.*
- Obavljanje pojedinih poslova iz samoupravnog djelokruga Grada Sarajeva može se, u skladu sa zakonom, povjeriti ustanovama, preduzećima i drugim pravnim licima osnovanim radi obavljanja javnih službi u Gradu Sarajevu.“*

Obzirom na naprijed navedeno, Statutom Grada Sarajeva nije propisana nadležnost Grada Sarajeva u oblasti zdravstvene zaštite te na osnovu činjenice da nije formiran niti jedan Savjet iz određene oblasti, nego samo Savjet gradonačelnice, nismo u mogućnosti realizovati inicijativu uvažene vijećnice.